

Apan sa dihang mag-ampo ka . . .

WWW.TENDAYSOFPRAAYER.ORG

ADLAW 9—PASAYLOA KAMI SA AMONG MGA SALA SAMA SA AMONG PAGPASAYLO SA MGA NAKASALA KANAMO

“Kay kon pasayloon ninyo ang mga tawo sa ilang mga paglapas, pasayloon usab kamo sa inyong langitnong Amahan” (Mat. 6:14, NKJV).

“Wala Nako Batia Kini”

Tigulang na siya ug nahimong elder sa akong simbahan sulod sa daghang katuigan. Naa siya karon sa ospital. Sa dihang mibisita ko niya, giingnan ko niya, “Ayaw ko ug ampoi, kay nahisalaag ko.” “Nganong nakaingon ka niana?” nitubag ko. “Pastor, nakasala ko. Nakabuhat kog dakong sala sa batan-on pa ko.” “Nangayo ka ba sa Diyos ug pasaylo?” “Oh, kada adlaw sa akong kinabuhi, apan wala Niya ako pasayloa.” “Giunsa nimo pagkahibalo?” “Ug,” siya miingon, “wala nako batia kini.” Gihisgutan namo ang tanan, ug sa katapusan sa among panag-istoryahanay siya adunay kalinaw ug kalipay.

Giunsa nimo “pagbati” ang pagpasaylo? Kini ba usa ka mainit nga pagbati sa imong lawas, o usa ka bugnaw nga butang sa tuo mong kamot, o usa ka pitik sa luyo sa imong liog? Masimhotan mo ba kini?

Tin-aw ang Bibliya. “Kon isugid nato ang atong mga sala, Siya kasaligan ug matarong nga mopasaylo kanato sa atong mga sala ug maghinlo kanato gikan sa tanang pagkadili-matarong” (1 Juan 1:9, NKJV). Wala kini nag-ingon nga Siya mopasaylo lamang sa gagmay nga mga sala o pipila lang ka mga sala. Kini tin-aw nga nagsulti nga kung kita mokumpisal sa atong mga sala, Iyang pasayloon silang tanan. Ang kondisyon: mokumpisal ka. Ang saad: Ang Dios mopasaylo. Buhata ang imong bahin, ug ang Dios mobuhat sa Iyaha.

Ang pagpasaylo dili usa ka butang nga imong bation o mapamatud-an sa siyensya. Kini pinaagi sa pagtuo. Gidawat mo ang Pulong sa Dios alang niini ug nagtuo nga ang Dios dili mamakak. Dili nimo kini ikasaysay, dili ka angayan niini, apan nasayud ka nga ang Dios nagsaad ug ang Iyang mga saad sinto porsyento nga sigurado tungod kay kini sumala man sa Iyang kinaiya ug Pulong. Wala nay mas luwas kay sa Pulong sa Diyos.

Sa imong pagsugid, ikaw gipasaylo dayon. Gibayran na ni Jesus ang bili sa imong sala didto sa krus. Siya mao ang “Kordero sa Dios nga nagakuha sa sala sa kalibutan” (Juan 1:29, NKJV). Igo na ang iyang dugo, ug diha sa Iyang dugo aduna kay katubsanang sa tanan nimong kasal-anan (Efe. 1:7).

Human nimo isugid kinahanglan kang motoo, sa pagtuo nga ang Dios nagbuhat sa Iyang gisaad. “Si Abraham mitoo sa Dios, ug kini giisip kaniya nga pagkamatarung” (Rom. 4:3, NIV). Hinumdomi, “ang mga matarong mabuhi pinaagi sa pagtuo” (Rom. 1:17, NIV). Sa imong pagtuo, ang Dios magamando, ug ikaw pagapasayloon. Ayaw sulayi sa pagpasabut kini o tinguhaa kini. “Kay tungod sa grasya kamo nangaluwas, pinaagi sa pagtuo—ug kini dili tungod sa inyong kaugalingon, kini gasa sa Dios” (Efe. 2:8, NIV).

"Pinaagi niining yano nga pagtoo sa Dios, ang Balaang Espiritu nagsamkon ug bag-ong kinabuhi sa imong kasingkasing. Ikaw sama sa usa ka bata nga natawo sa pamilya sa Dios, ug Siya nahigugma kanimo sama sa Iyang paghigugma sa Iyang Anak" (*Steps to Christ*, p. 52). Ang kapasayloan, pagkamatarung, kaluwasan—kining tanan nabatonan isip gasa pinaagi sa pagtuo.

"Ikaw usa ka makasasala. Dili ka makahinlo sa imong nangaging mga sala; dili ka makausab sa imong kasingkasing ug makabalaan sa imong kaugalingon. Apan nagsaad ang Dios nga himuon niya kining tanan alang kaninyo paagi kang Cristo. Tuohan nimo ni nga saad. . . . Kung motuo ka sa saad . . . Ang Dios nagahatag sa kamatuoran. . . . Ayaw paabota nga bation nimo nga pinasaylo na, apan ingna, "Mituo ako; kini dili tungod kay gibati ko kini, apan tungod kay ang Dios misaad" (*Steps to Christ*, p. 51).

Samtang imong gipunting ang imong mga mata sa krus ni Jesus, imong nasiplatan ang hilabihan nga pagpadayag sa gugma: Si Jesus, Magbubuhay, ang Usa nga namulong ug kini nahitabo, ang Usa nga giyukboan sa mga anghel sa ilang kaugalingon kaniadto, ang Dios sa Uniberso nga nanaog ug nagpakatawo. Siya, ang Usa nga Balaan, mikuha sa imong mga sala, ug namatay alang kanimo. Ang Dios namatay alang kanimo.

Itutok ang imong mga mata sa Iyang krus. Mamatikdan dayon nimo nga kadtong nakasinati sa grasya nagpaambit usab sa grasya nga madagayaon. Kadtong nakasinati sa pagpasaylo, magapasaylo usab. "Ang dapit sa tanang kapasayloan makita lamang diha sa dakong gugma sa Dios, apan pinaagi sa atong kinaiya ngadto sa uban atong gipakita kon ato bang giangkong ang mao nga gugma." (*Christ's Object Lessons*, p. 251).

Magdungan ta sa pag-ampo.

Oras sa Pag-ampo (30–45 Minutos)

Ang tanan nga mga grupo sa pag-ampo adunay lainlaing mga paagi sa pag-ampo nga magkauban. Kami nag-awhag kaninyo sa paggugol sa sunod nga 30-45 minutos sa hiniyang pag-ampo, sa bisan unsa nga paagi nga ang Balaang Espiritu mogiya. Among giawhag ang mugbo nga mga pag-ampo (1-3 ka sentence). Gitugotan niini ang daghang mga tawo nga mag-ampo sa daghang beses. Sa ubos mao ang pipila ka mga pananglitan sa pag-ampo pinaagi sa Kasulatan base sa tema. Mahimo kang mag-ampo pinaagi sa ubang mga tudling ug ilakip ang ubang mga hilisgutan sa imong oras sa pag-ampo. Tan-awa ang Giya sa Lider ug Mga Pangayo sa Pag-ampo sa Kalibutan nga Simbahan alang sa mga ideya sa pag-ampo.

Pag-ampo sa Pulong sa Diyos—Mateo 6:14

"Kay kon pasayloon ninyo ang mga tawo sa ilang mga paglapas, pasayloon usab kamo sa inyong langitnong Amahan."

"Kon imong pasayloon ang mga tawo sa ilang mga kalapasan"

Amahan, among gisugid nga usahay dili kami gusto nga mopasaylo. Luwasa kami gikan sa kasuko ug kalagot. Usba ang among mga kasingkasing ug ipaagi kanamo ang Imong grasya ngadto sa uban. Usba

ang among mga kaaway nga mahimong higala ug hiusaha ang among mga kasingkasing sa pag-alagad alang sa Imong gingharian.

“Ang inyong langitnong Amahan mopasaylo usab kaninyo”

Salamat, Ginoo, sa dili takos nga mga gasa sa paghinulsol ug pagtubos. Usahay maglisud kami sa pagdawat sa Imong kapasayloan ug maningkamot nga maangkon ang Imong tabang. Tudloi kami sa pagdawat sa Imong kapasayloan nga malipayon ug ipaabot kana nga grasya ngadto sa uban.

Dugang Sugyot sa Pag-ampo

Pagpasalamat ug Pagdayeg: Pagpasalamat alang sa piho nga mga panalangin ug pagdayeg sa Dios tungod sa Iyang kaayo.

Pagkumpisal: Paggahin ug pipila ka minuto alang sa pribado nga pagkumpisal ug pagpasalamat sa Dios sa Iyang pagpasaylo.

Giya: Hangyos ang Dios sa paghatag ug kaalam alang sa kasamtangan nga mga hagit ug mga desisyon.

Atong Simbahan: Pag-ampo alang sa rehiyonal ug tibuok kalibutan nga mga panginahanglan sa simbahan (tan-awa ang separado nga papel nga adunay mga hangyo). **Lokal nga mga Hangyo:** Pag-ampo alang sa kasamtangan nga mga panginahanglan sa mga miyembro sa simbahan, pamilya, ug mga silingan.

Paminaw ug Pagtubag: Paggahin ug panahon sa pagpaminaw sa tingog sa Dios ug pagtubag sa pagdayeg o awit.

Mga Sugyot sa Alawiton

SDA Hymnal: Amazing Grace (#108); Old Rugged Cross (#159); Redeemed (#337); Blessed Assurance (#462)

Other Songs: Grace That Is Greater; Behold, What Manner of Love; For God So Loved the World